

DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ

Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS

manè discutienda in Scholis Medicorum, die Martis nona mensis

Decembris, anno Domini M. DCC. XLIX.

M. JOANNE-JACOBO BELLETESTE, Doctore
Medico, Præsidente.

An in Abscessibus Intestinis suppuration per vias urina & speranda & promovenda?

I.



POSTEMATA, sive (Latinis) abscessus atque *decubitus* in partes corporis humani quascumque, ubicumque tum intus, tum extra fieri tonsoribus & lippis notum est. Triplici terminari ratione, resolutione scilicet, suppuratione, aut gangrænâ, quartam non esse viam exitus novit quivis philiater in rebus medicis adhuc recens. Resolutionem ægro non minus, quam Medico placere; suppurationem frustra speratæ resolutionis vices supplere, non raro, haud infeliciter; gangrænâ detestatam semper fugi cane pejùs & angue in confesso

est apud omnes. Felices nimium Medicos si inter diversos quos omni arte natura sæpe potentior affectat exitus, medenti liberum esset & optare, & convenientiorem viam eligere! At eheu quò natura vergit, eò se convertat Medicus oportet. Resolutionem molitur si sinat natura, si faveat ægri valida temperies. Suppurationem incœptam jam, incassum tentet deturbare; gangrænâ defavientem frænare, corrigere qui velit, minimâ grande periculum in morâ: imminentem tantummodò averruncare, magnum opus, hic labor est: ea cura medicantem sollicitat. At vitanti scyllam proxima est charybdis. Largâ sanguinis missione, eâque præproperâ, diætâque exquisitâ ultrâ modum, sphacelus arcetur ab aliquo viscere! Manet suppuration; quid fiet? Dabitur-ne licentia puris foras ejiciendi? Quâ patebit transitus? Non semper se manifestum sub cute foras eliciendum prodit: quâ rumpet iter? Per secessum? Optime quidem, si intrâ fistulam intestinorum pus suum evomat apostema; sive quòd intèr illorum tunicas enatum hâc, datâ portâ, ruat: sive quòd alteri cuilibet abdominis parti insitum delitescat, quæ, naturæ vitio vel casu, cum aliquo ex intestinis crassis aut tenuibus tam arcto sit vinculo unita, atque ferruminata, ut sinè ullâ in abdomen *extravasatione* possit per canalem intestinorum pus omne & integrum eliminari. At raro adest tam fortunata rerum dispositio. Ideò-ne prorsus omnis abjicienda spes? Absit. Non unica est naturæ via ad salutem. Sub cute delitescantes apostases, tenuatâ, dilaceratâ cute viam sibi faciunt; quæ in ventriculo, per vomitum, sæpè; interdum catò; quæ in intestinis per secessum vulgò sibi quærunt iter; quæ in substantiâ renum per ureteres in vesicam; quæ in vesicâ per urethram, exitum inveniunt; quæ in pulmionibus per *expectorationem* excreationemque liberantur. At quæ in aliis partibus corporis, vel in remotissimis secessibus latent penitior angulo non desperent exitum. Miraculis fœcunda semper natura huicce *decubitus* ultimo generi voluit ineffe

2

exempla sanationis, viasque mirabiles aperuit ipsa; quibus intus creatum efflueret venenum, liberataeque partes sanitatem pristinam, fugato hoste domestico, recuperarent. Exemplum quidem, ne se credat immortalis mortalis homo, pauca tamen ne desperet, sciatque morituro similem non magis esse sine spe, quam sine metu esse debere athletico gaudentem habitu. Hoc iter, est urinarum via; remota quidem, non tamen fausta minus. Non adversatur ratio, favet experientia, rara quidem, idcirco pretiosa magis. Parva confiteor, sed tamen sola spes, ideoque non remnenda in abscessibus intestinis, cum nulla alia pateat via. Illam ne despicias quae si non certo procuranda est, tamen speranda est, quae est plausibilis & doctrinae μεταστασιν analogae, atque fabricae corporis humani consentanea mechanismo, nec nisi felicem exitum obtinere potest? Si speranda, quis promovendam non censeat operationem ex qua tanta in humanitatem redundare debent commoda?

I I.

NIHI L unquam in rebus physicis adversante naturam moliendum. Quod natura vergit, educendum. Quodnam sit illius votum noscere haud semper in promptu est. Ab illa expectaveris frustra quidquid partium nostri corporis compactioni, & structurae foret alienum. Consulenda igitur in omnibus; quid valeat, quid ferre recuset. In apostematum ratione quid affectet, iudicatu persaepe difficillimum. Suppurationem intentant omnia, rubor rutilans, lancinans & indefinens pulsatio, calor urens intensissime! Admoves maturantia, *helctica* seu attrahentia, ut liliorum pulpam, Diachylon cum gummi! Delitescit humor. Resolutioni favendum putas! Emollientia tum sola tum permixta solventibus admoves! Induratur humor, te invito, te coram spectante, te contrarium meditante; concrevit, abit in scirrhum. Hunc si quis temere aggrediatur imprudens, horribilis visu se se expandit cancer. Quoties ex improvviso longe lateque inamabilis desavit gangraena? Quod si in externis tam difficile iudicium, quid fiet in intestinis? Si ex duplici in qua continentur lamella, unam exitui propiorem potius quam alteram ruperint apostemata, mens humana capit quam via pestis illa e corpore ejici possit. At in partibus ab omni crassiorum excrementorum itinere remotissimis, qualia cerebrum, partes carnae sive musculares a cute longe diffusae, cellulae adiposae interiores, quae ut aspectum ita contrectationem manus (securae nimis extrinsecus) respuunt, incassum ferro & igne corpus pervadere tentaveris: ut naturae, sic arti repugnat tam grande nefas; alia, si fiet, quaerenda via est. Ars consulenda; si quam noverit, ea promovenda; nec quidquam sperandum nisi sit ex animalis oeconomiae doctrina plausibile, nisi illius analogum atque consentiens mechanismo: nihil promovendum, ex quo faustum felicemque eventum obtinere atque sortiri nec speres, nec queas; & vicissim.

I I I.

ABSCCESSUS intestinus grande malum. Si viam exitui paratam habuerit per intestinale fistulam, per aures, per urethram, per os, semper grande malum. Si non habuerit, magis grande malum; ne tamen desperes. Longiori quidem itinere, at noto & permeabili patet per medium ipsum sanguinem, per urinas via, quam foras a remotioribus locis eliminari possit materia peccans. Probat quotidiano usu nimis confirmata *Metastases* doctrina; favet structura partium; appetit natura sui conservatrix, & quod non quit e proximo, meditatur e longinquo. Et quaecumque fugam moliatur e corpore nociva materies, bene est. Haec fugae sive beneficio naturae, ac fausta fortuna sive arte procurata non potest quin prosperum ac felicem sortiatur effectum. Metastases fieri in corpore lethales si constat, fieri quoque salutiferas docet experientia. Si Erysipelata exteriora introverti malum, eadem interiora foras emicare bonum. Ab agro pede transfuga humor arthriticus caput impetat! qui prius absque vitae periculo de dilacerato pede misere conquerebatur, jam doloris, at non periculi securus & expers; mortuo quam vivo similior obmutescit, donec felici altera si potis est metastasi retrò pulsus humor aut pedem repetat, aut cujuscvis alterius partis dispendio caput relinquat. Rheumata & Catarrhos derepente in partes nihil tale metuentes irruere quis nescit? Sunt igitur in corpore humano viae cum cognitae, tum lapsu temporis cognoscendae, per quas liberè ab omni corporis parte ad quamcumque alteram itur; daturque inter omnes & singulas certum nec dubitandum commercium. Quamvis aetas nostra nepotibus nostris longè plura quaerenda relictura sit, quam inventa, non ideò tamen nostris temporibus ita caecutit, quin pervideat quam viam in remotissimis partibus suppuratus humor possit ex illis ad vesicam usque transinigrare, inde foras ejiciendus; nullas novit anatomia partes non permeabiles: vix excipias fibræ primam, stamen illud spermaticum ex quo aliae fibrae constant. Canales merito habentur omnes ad instar telae aut panni porulis undequaque pertusi: illac transudat humor tenuior in canale præterfluens. Forsan effugeret omnis, si diutius moraretur. Nullus est in corpore locus tam arctus, nulli adsunt tam clausi carceres, quos non pervadat.

fluidum per corpus omne circumfluum, unde eadem de causa non possit regredi. Vascula sanguinea sanguinem ad singulas minimasque fibras devehunt: quod non absorpsit singula, revelunt. Quod recens absorpsit unaquæque, sibi servavit, aut applicuit, tam bene potest dimittere, quam partes quæ quotidie deteruntur, quarum reparationi invigilat, nutritionis functione, provida & sagax natura. Vasa si addas lymphatica ex arteriis oriunda variis confectis itineribus in venas hiantia, secretoria & excretoria, alia in glandulas, alia in vasa lymphatica succum acceptum evomentia, tandem in massam sanguineam; quot erunt aditus per quos à parte remotissimâ per massam sanguineam ad renes usque trajici poterit? Quænam est pars ita densi contextus quæ non constet filis inter se decussatis se se mutuo intersectantibus? Est ne intersectionis loco contactus verè immèdiatus, verè perfectus? Positâ decussatione, nec est, nec concipi potest: Pus tam arctè clausum quàm volueris, in folliculo quàm densissimo supponatur, patebunt semper exitus viæ. At vulgò non hâc ratione, ob spissitudinem, pus ex abscessibus intestinis effugiet, tunc enim resolutio non suppuratio fieret. Rumpitur maturato pure plerumquè abscessus. Pure in textum cellularem qui per corpus omne pulvinaris ad instar cuivis vel tenuissimæ parti substernitur, effuso, liquet quâ ratione illius *resorbitio* possit peragi, in parte quæ perpetuâ muci vel roris effusione & jugi ac recia procâ *resorptione* semper humescit. Interdum inviolato folliculo remeat: suppuratio puritrescunt extrema vasorum arteriosorum, tum sanguineorum tum lymphaticorum per quæ accessit congestus humor. In liquamen paritèr abeunt tubuli venosi congeneres per quos reversus fuisset in sanguinem idem iste humor collectus. In promptu est quâ ratione communem sanguinis alveum repetere possit pus diù multumque dilutum & perfectè liquatum. Utracumque viam elegerit, facilis descensus renum: Quis igitur non movendus lapis ut hanc viam ineat? Quanta spes si unquam vel arte vel naturâ hoc iter affectare possit?

I V.

NEC nova etsi rara, nec inaudita loquimur, nec invisa: pluriès ire per urinas ipsi testes oculati vidimus, post inflammationem viscerum abdominis, pectoris, ipsiusmet cerebri & aliarum crassiorum corporis partium, quàm præcesserant dolores urentes & lancinantes, rigores, horrores (diutino tempore) frequentes die ac nocte, febres continuæ cum inordinatâ vehementium paroxysmorum frequentia, cum cardialgiâ, interdum animi deliquio, subultibus tendonum, tremore artuum spasmodico, cum pulsu tremulo & centiès per dies vario, materiam ita puri similem, ut pus verum esse non dubitaremus. Absurdum-ne foret pluriùm febrium malignarum causam assignare puri in interapeis *sentiri*; facti, per renes expulsionem, morbi sanationem tribuere? Hæc materia urinæ comes illam primò turbulentam reddit: da moram: paulisper quiescat in cyatho; brevi subsidet in fundo vasis, puris ex luteo sulphureo vel pallido candidi major minorve copia. In quo dignoscatur hæc materia à liquamine lymphatico fibroso & viscoso, aliis urinæ morbis peculiari, cum symptomata præfata indicant, tum *consistentia* seu spissitudo diversa, & odor. Pus penitus solvitur in aquâ, & quantumvis spissum levigatione brevi morâ liquefcit prorsus; non itè *subsidentia* lymphaticæ, quæ ramosa innataat longum; dum purulentæ extèmplò se dant præcipites; quæ non fœtent dum intolerabilem exhalat mephitim purulenta *subsidentia*. Hoc, inter plura, quæ interdum in praxi occurrunt, exempla, vidimus non semel, nec sinè magno lætitiæ sensu. Duobus exemplis propositum confirmare sit satis. Ephebus quidam anno ætatis circiter 14 dolore subito, eoque vehementi fuit circa tibiam sinistræ malleolum dèrepentè correptus. Accersitus extèmplò Chirurgus locum invisit; doloris indicem cum rubore tumorem lèvem agnovit, Cataplasma appositum fuit ex lacte, ni fallor, & micâ panis; misit sanguinem, altero die rejecto cataplasmate emplastrum substituit Diachylon cum gummi; vix tertia illuxerat aurora, fluctuare intus paulisper materia. Chirurgus velle, nec forsàn immeritò, quàmvis paulò maturiùs iusto, pure nondum perfectè maturo, inclusam pestem ferro educere. De carissimi nati periculo mater admonita filium à præceptore apud se transtulit; illicò familiari commisit Medico: post duos tresve dies pure magis eliquato, copiâ majori collectâ, tenuatâ magis cute, atque cataplasmatibus emollientibus & attrahentibus ex bulbis liliaceis, beîâ, oxalide, fermento, melle, sicerâ & axungia paratis emollitâ, necnon ab inflammatione, doloreque liberatâ, Medicus ferro aperientidum censuit apostema. Non renuebat Chirurgus; mater tenerrima simul ac fortis non obstabat; solus puer alioquin ingenuus itâ reluctabatur ut per octo & ampliùs dies suaderi se passus non fuerit; carissima parens nato vim inferri nolebat. Folliculus puris crepuit intereâ medius, sed à parte internâ. Partes subjectas innumera ossicula quæ substernuntur, omnia ligamenta quibus internectuntur, tendones, musculos, textum omne pedis nerveum, celluloseum, aponevroticum, quâ data porta inundavit; totus pes intumuit, adèd ut libram & ampliùs puris continere videretur. Mater, consilio Medici, iterare preces vellet ut natus pedem aperiri, brevi (si hoc nollit) amputandum; constanter ille renuere. Regimine exquisito interim cui ma-

ter invigilabat præscripto, & in usum vocato leviter aperiente potu, natura insperatum opus moliebatur. Constanter renovata bis aut ter quâque die cataplasmata: prodiit in conspectum pus copiosum effluens cum urinis: pes detumuit, non tamen sine interruptione, interdum enim per integros dies cessabat fluxus puris; quod paucos post dies audivimus tribuendum fuisse malè obsequiosæ custodis temeritati, quæ quater aut quinquies allatis clam uvis aut similibus eduliis vigilantiam matris deceperat, undè non tantum hæserat pus, sed penè suffocatus fuerat puer: tandem detectâ fraude pulsâque perfidâ custode, spatio quinque aut sex hebdomadam convaluit æger; nec claudicationis ullum post aliquot menses remansit vestigium; sanissimo hodie ab octo jam annis & amplius remanente corpore. Alterum exemplum puellæ viginti quatuor circiter annorum, cui post inflammationem universi abdominis remansit in hypogastrii regione sinistrâ tumor prægrandis qui omnia suppurationis manifestæ suppeditabat indicia. Tumore maturo crepuit similiter Folliculus. Puris diluvio inundatæ partes subjectæ, coxa, tibia, pes. Variis in locis, tunc frustra tentata apertura, peracta nullibi: malè habuit per menses plures. Puris quod per duos & amplius menses unâ cum urinis fluxit, effusione, febris evanuit; virgo sanitatem recuperavit, viresque rediere. Alia proferremus plura quibus fluxum puris per urinas (sanis renibus & organis *urinariis*) viam fuisse salutiferam in evacuantibus abscessibus intestinis, testes ipsi fuimus. Verùm ab uno abundè exemplo rem posse fieri constat, ex voto naturæ esse, doctrinæ *Metastasis* esse analogam, respondere partium structuræ, felicem fortunatumve non posse non eventum sortiri, si hanc promoveri siverit natura.

V.

MAGNÆ molis opus est è tam longinquo pus arcessere ac ciere! Fateor ardua res est: At quocumque fertur sanguis hinc remeare potest. Si locus foret quo non permearet massa sanguinis, haud mora non alteram lucem videret æger. Nulla caret in corpore circuitus commercio insula; melius dixeris in microcosmo peninsulas reperies, insulam nullam. Undequaque & quaquaversum unâ permixti cum sanguine peregrinari possunt humores extranei, puri, impuri, permixti bonis mali, prout se dabit occasio. At diureticum quod tam mirabiles producat effectus nullum indicas! Qui indicarem Medicis? Diuretica per se nulla sunt; omnia relativè ad objectum. Generatim dictâ tenui & exquisitâ imò exquisitissimâ tantum, & diluentibus pus liquefacies, canales emolles: sic rebus dispositis lentâ festinatione indefessè moliens, nec moræ longissimæ fastidio abalienatus satiatulve noveris è facili aperientem quæ ad morbum faciat medicinam, diligens observator. A mitioribus incipe, tutus ibis. Febrem consule, pulsus indicem operum, sedulus explora. Laxam habe alvum. Emollientibus externis, si opus est, flexilem fac semper; pori cutis cave strictiores indefinentis (quâ vita pendet) perspirationis obliviscantur. Porta pateat ubique. A naturâ plurimum, non nihil ab arte expectes. Febrem præcipuè cura, cave tamen præsertim à cortice febrifugo. In causâ fuisse cur multi perirent, apostemate laborantibus imprudenter, aut immaturè exhibitum, asserere non ausim; sed rigores, horrores & paroxysmos febrium continuarum quæ apostemata comitantur, auget, nedum minuat. Febrem quâcumque arte aliâ profliga, res prosperè cedit. Verùm hâc arte paucos liberabis! Imò paucissimos; ast aliâ quam sciam nullos.

Ergò in abscessibus intestinis suppuratio per vias urinæ & speranda & promovenda.

DOMINI DOCTORES DISPUTATURI.

M. Petrus Chevalier.

M. Jacobus Verdelhan des Moles.

M. Ludovicus-Petrus le Hoc.

M. Franciscus Bernard.

M. Claudius Person.

M. Antonius-Nicolaus Guenault.

M. Joannes le Thieullier, Chirurgiæ Gallico Idiomate Professor designatus.

M. Ludovicus-Renatus Desbois.

M. Paulus-Jacobus Malouin, Regiæ Scientiarum Academia Socius, & Regius Librorum Chemicorum Censor.

Proponebat Parisiis, MARTINUS NOUGUEZ, Adurensis, è Comitatu Armeniaco, Saluberrimæ Facultatis Medicinæ Parisiensis Baccalaureus, A. R. S. H. 1749, à sextâ ad meridiem.